

'aehoe' minowa' ki mae'iyah

'aehoe' minowa' atomal ki mae'iyah, noka mae'iyah pa'iyalawa'en
ka taew'an, pa'iyalawa'en ka Sinpanan, 'aehoe' ra:am Siyae' ki korkoring,
noka korkoring rengreng tortoroe'en ka maSa:en, talihima' o 'ae'ae:aew,
rengreng ila ki ma'iyah ma' ra:am ila bazae' ka pina'iyaka:i'. nakhini kin
kayzaeh ki mae'iyah, 'ita' ka mae'iyah ma' paskaykayzaeh Sopan 'izi' 'i
boloe'.

hayza' 'aehae' haehila:, hini ka 'oemaeh mowa:i' haeba:en ka
mae'iyah kama manmanra:an rini. So: maSangay ila ma' tontonton ila ka
mae'iyah. kama maraS ka 'aehoe' ma' haeba:en, kita'en ila haysani
kayzaeh ila 'oyeh ka kin'i'iyah noka 'aehoe', hayza' mae'iyah 'ima
komontotol kapama'en ka korkoring, haw 'izo' kinontotol ma' ka 'aehoe'.
kita'en ray sale'e: ray tae'oeloh pinhalay saeboeh ka pongaeh, 'aehoe' naw
ra:am ma'iyaka:i' 'am komoSa' 'ay kapowa'en yako takahini'in, 'ana Siyae'
ma' 'okik ra:ami! 'aroma' 'aehoe' noka kamamalahan 'inewel ray hima'
kayni' Siprae:iw ra:waS, kita'en ma' hayza' ka tina'aes pinakba:aw
ka 'aehoe'.

So: 'ima kayzaeh ka mae'iyah ra:am pat'izaeh ka pinakhara:i'

noka 'aehoe', ray latar pakba:aw ka 'aehoe' ma' pakra:am kalahang 'oyeh
noka mae'iyah 'ima ra:nawan ka panpanra:an, nak'isaza 'isa:a' maylal'oz.
yako ziza tabin hila:an 'ima komitkita' noka mae'iyah Sipakba:aw
ka 'aehoe', kita'en 'aehae' 'ima 'oel'oelae'an o 'ima 'iyabolalas ka 'aehoe',
ma'an kitkita'en ila 'oka' ka mae'iyah mowa:i' komi:im, Sipanhae:ae' ila a
Siboloe' ila noka mae'iyah? honha:i' naehan 'am haewan ila, 'oka' ka
mae'iyah mwa:i' komi:im. 'iyakina 'alibih tikot koSa'en
marma', 'itayso'on ila ma'an.

Saehpi:ih ila 'am 'aehae' 'ilaS, yako rima' ila naehan manmanra:an
ziza, kita'en haysiya hiza ka 'aehoe'. somingozaw ila ka Say'isa: mae'iyah,
ra:am ila Sa' binoloe' noka mae'iyah, lasiya ila tomabo: ka hiza 'aehoe'.
yako ma'az'azem komSa', yako mayhael So: hayza' Sompan ka 'aehoe',
ma'an ka taka'ino'on 'am Sompan? tortoroe' ka Sa:en, talihima', 'ae'ae:aew,
hayza' naehan ka si'ael. 'aehoe' noka mae'iyah
paskaykayzehen, 'aehoe' 'ana 'inowan ma' miyalawa' 'iniya'om ka 'aehae'
taew'an.

狗是人類的好朋友

狗是人類忠實的朋友，牠們看家、看管雞群，還會和孩子們玩耍。人和狗可以相處得很好，應好好對待勿丟棄。帶寵物的人很多，大部分都是狗，狗坐嬰兒車，頭上掛著花花綠綠的東西，要是能說話，會不會說：「怎麼把我打扮成這樣？」其他的狗被主人牽著不讓牠亂跑，有的狗自在地跑著，有的主人會清理狗的排泄物，讓其他人有好的休閒空間。

一隻小白狗到了天黑都還在，原來是被丟棄，附近的人負責飼養小白狗。狗被好好對待，就會守護我們。